

典深解玄義了真法地
於是四眾聞大慈尊說經都畢瞻禮真顏奉
辭而退

太上一乘海空智藏經卷之九

太上一乘海空智藏經卷之十

月十

普記品

爾時天尊於寶城中顯現神力化作女臺微
妙第一臺中爾時復有七寶莊飾珠持懸繒
幢蓋周遍臺中爾時

天尊於其臺中發大光明遍照十方无極世
界十方諸國悉皆朗然當爾之時諸天大聖
飛天神王丹靈始老太上天尊扶桑玉晨上
皇帝君諸天真人左右二真人童子地仙
道士三界魔王萬海龍王善男善女若人非
人俱來座所聞大哀尊演說一乘海空智藏
如我等輩心大歡喜各各齋持百和之香不
焚自薰諸天妓樂同時俱作行道讚歎奉獻
珍寶價直无量爾時
天尊欲隱神光還於玉京長樂舍中不動之
地告海空言若有疑者正欲及時可速問決
无上法寶不久入定汝等眾中有疑請決勿
懷憂悔爾時座中有一道士名曰寶光聞大
哀尊說此語已悲泣流淚不能自止苦哉哀
尊云何這還不動之地我等下仙孤露莫止

爾時眾中復有神觀不可思議上真童子從
座而起稽首作禮長跪再拜曰天尊言欲有
所問將不及耶唯願哀尊不為罪咎於是
天尊歎童子曰善哉童子汝之功德不可思
議人神智源化導眾生悉為備矣

於是童子曰大哀尊大慈天尊過去滅後一
切眾生不復親見哀尊色身亦不得聞海空
真法何以故未來世中人民澆薄善法漸衰
惡法熾盛當爾之時教諸眾生作福德果最
為殊勝而得度脫煩惱城中唯願慈尊特垂
憐愍用財甚多功果分少不及其一善男子
若有眾生如是施養十方三界天尊并諸大
聖三天真人地仙道士如是施者不如有人
慈心一切布施畜生一口飲食令濟彼命全
得安穩如是功德最勝彼福百千萬倍如是
施心甚大功德无量无边善男子我於處處
真法經典說布施者欲令新學地仙道士出
家在家善男善女發海空心修慈悲行布施
貧窮孤獨老病憂危牢獄饑寒切肌窮餓之
屬普令飽足如是施者是名橋梁濟度生死

善男子未來眾生不解我法專施敬田不施
 悲田善男子云何敬田若有眾生禮拜十方
 三界天尊供養三寶以是因緣是名敬田云
 何悲田善男子若有眾生慈悲供養不擇畜
 生以是因緣是名悲田善男子此二田者悲
 田最勝若有一人施悲田者如是之人功德
 甚大虛空不容善男子若有眾生多饒財物
 獨行布施從生至老无有休息如是之人不
 如有人不問貧富貴賤賢愚若道若俗共相
 勸化各出錢財聚集一處隨宜布施貧窮孤
 老惡疾重病死困之人悉皆平等如是功德
 最大无量設使不施念念之中施功常生亦
 无窮盡善男子未來世中我諸弟子新學道
 士好樂衣服食嗜美味貪求利養慳貪積聚
 不行慈心專行瞋恚見他作善心懷嫉妬佯
 共譏笑咸言此人求覓名利非我道士若見
 布施貧窮乞人復生瞋恚如是之念非出家
 心依我法門而行慳貪執心染著便求見効
 以自給活見我真法種種惡言生不信心領
 戶化民但脩小乘有為之業何用紛紛動亂

人眾別令見明爾時
 天尊告童子曰汝能詰問作法橋梁作法梯
 磴善哉善男子來世眾生甚可憐愍何以故
 一切眾生縱有信心勤身苦行不令正理作
 福彌積獲報甚微善男子未來世中三界道
 士男官女官國王大臣富貴長者若男若女
 若人非人輕賤我法薄淡三寶无有實故雖
 作眾善求名求利求勝他故无有一人作一
 念心作出世心善男子譬如伎兒種種巧妙
 令眾歡喜如是伎兒非歡喜心善男子三界
 道士修學末法亦復如是我過去後真法隱
 滅惡魔顯現邪心甚興姦巧互攻叢毒競起
 善男子云何是邪一切道俗不識法軌學人
 作善舍中設會恩愛請師列名別請遣人防
 門遮障外師不聽入會或貧或病欲入乞食
 復障不聽如此設會徒喪飲食了无善分復
 有一人專欲獨善不化眾生見他作善不能
 隨喜助其少分如此人輩其福微劣復有一
 人見他治舍形像經書破壞墮壞不肯修治
 便作惡言非我先宗基業所造如是破壞何

用治為我寧自造起立新者終不更治故立
 形像及以經典善男子如是人者是名自見
 非見我也名自功非功我也何以故一切
 眾生造立新者不如修故功德甚多得見我
 相得入法藏海空真地善男子復有眾生見
 他聚集作功德業但求名聞傾家財物以用
 布施及見貧窮孤獨呵罵驅出不施一毫如
 此人者名為顛倒作善癡狂妄學施心實无
 慈想實无施相如是施者不正淨施不正淨
 福集地獄因拓三塗果如是眾生甚可哀憫
 无益之事虛喪失功不如我今守化民物甚
 大功德善男子作是念者非出家人是魔眷
 屬是外道心非我弟子其人命終墮大地獄
 經歷受苦從地獄出入餓鬼中受大苦惱從
 餓鬼出受五百身牛馬猪羊或作狗身從狗
 出已五百世中受生貧賤饑渴困乏種種苦
 惱无有一念適意之時何以故見他施時不
 隨喜故善男子我今成道皆由過去恒沙劫
 時行慈布施救濟貧窮困厄眾生十方天尊
 得成真道皆由布施而得常樂不動之地以

是因緣我為衆生種種演說行平等心慈悲
喜捨以為初學善男子譬如有人兩足俱折
意欲速涉不能進前須墮一處種種方便亦
不能得善男子慳貪道士亦復如是雖行道
士著大法衣經恒沙劫不行布施亦不能得
當到海空真實法地善男子若有道士不行
布施則法不全法若不全則无慈悲心无慈
悲心則无忍辱心无忍辱心則无精進心无
精進心則无方便心无方便心則无智慧心
无智慧心常受煩惱牛馬之身隨人所使亦
不能言四足而行无有人心常受苦切善男
子若有一人布施法門十方天尊皆來讚歎
恭敬尊重為說一乘法藏真實以是之故功
德福中財施最勝善男子我又方便種種教
化或入火中鍊身受法或入大海化諸龍王
或作病身而合醫藥或作貧人而共迴向或
說符圖以誅姦兇或勸受戒護我法門或勸
忍辱鍊心精進或讚智慧能為衆生種種巧
說能令衆生離煩惱城善男子未來道士未
識我意種種方便各執是非說已所能誑惑

百姓更相嫉妬如是人者是惡道士不可親
近滅真法門毀我空性聚會若說法時不遠
深意自是目說誹謗一乘海空智藏作諸說
言隨文取著違背實相无上真法口常自歡
我所說言應著正理善男子諸惡道士作如
是說是魔眷屬外道之師習學小乘領尸化
民如是之者永淪三塗風刀往還日生日死
金捷亂拷食息无閑鐵則食炭渴飲火精萬
劫當得生於人中聾盲瘖瘂有人之形无人
之情善男子諸惡道士復作是言此人愚癡
猶如株兀汝求名譽道在心中汝學經論何
所修行作是語者是惡知識不可親近異道
邪魔以為眷屬善男子諸惡道士為名利故
遞相毀謗不存經法自尊已見以非為是不
能分別是邪是正遍向道俗而作是言我能
知是我當知非如是說者毀滅我法是惡知
識不可親近善男子諸惡道士於經法中不
達深意便作是言大乘法中聽我食肉如是
說者是惡知識是邪見師不可親近善男子
若有道士了我真相空无食相空无異相對

治衆生種種方便應以淫身而得度者則現
淫身應以凡身而得度者則現凡身應以病
身而得度者則現病身應以國王身而得度
者則現國王身應以道士身而得度者則現
道士身應得度者則現其相常恒說法不動
其心而作動相不作現身而作現相不作真
身而作真相不化衆生而作化相如是說者
名大法師常住海空七寶城中為他說法度
脫衆生今入一乘真法藏善男子今日座
中童子无量各見不同或見我身在玄都山
湛然不動或見我身住世說法或見我身
長丈六端正第一或見小身或見大身或見
我身坐寶蓮花或見我身度脫衆生今入寶
藏或見海空不可思議善男子我當教化隨
身无常遊行止住一切所為皆悉遠離世間
之相亦復不離世間示現演說法相或說一
偈一行一句海空法者若有一人能唱善言
心大歡喜如是功德隨衆生根種種利益合
門與隆子孫昌熾不可思議善男子諸惡道
士不解我義宣說三洞三十六部經隨文取

義作決定心是有是无當知此人毀滅我法善男子新學道士自稱我能稱是法師稱是度師稱是經師如我法門相說過相毀訾此三種人入地獄中亦不捨心如是眾生實可憐愍爾時四眾聞大哀尊說此語已各各起

立涕哭作禮長跪再拜稽首受記

爾時眾中上真童子而復白言大德天尊演說法言諸惡道士毀滅我法如是法者當何時出諸惡道士當何時滅唯願天尊為我等故分別說之爾時

天尊答童子曰善男子我過去後真法普行人民興盛國王行道无大傷心无殺害心无貪愛心百姓男女无嫉妬心善男子經八千年真法還藏惡法漸興國王无道人民好富更相嫉妬貪毒陰賊攻伐主殺官无度後經八百七十年中諸惡道士周偏下土不行道法多求財物專行非法多畜八種不淨之物身无才智招集弟子自作一法傳度非宜妄造經典傳行國界以是因緣一切俗人輕賤三寶穢辱天君種種誹謗生不信心毀滅

天書破壞符圖殿堂屋舍形像法身悉皆毀滅以是因緣日月不光陰陽不調五穀不成風雨失時龍久旱淵人民惡相好殺害心競相華尚貪營富貴仁義不行薄有錢財君子小人各隨所宜念於色欲當爾之時縱有一

人發心微善雖造觀舍三寶形像真法經典臺殿房廊如是人者亦不能生恭敬之心不能供養法師之心不捨飲食衣服卧具於中反更借取乞食餐飯師食亦不思惟畏未來世三塗之苦善男子一切俗人舉心作善專欲侵損三寶法物如此人者假名作功永墮

三塗餓鬼之身善男子未來世中一切俗人假名官號不信罪福不敬三寶劫奪師物飲食衣具或稅取眾穀米熟食乃至一毫三寶法物或彊驅使三寶奴婢或逼乘騎三寶牛馬貪取奴婢以為私使逼略出家以為妻妾而不思惟未來世中銅柱鐵牀當到其處而不思惟我身之身如路死狗如幻如夢如電如光善男子若有一人於惡世中種種方便度脫眾生學慈悲心學智慧心受持一乘海

空智藏微妙經典一心讀誦晝夜不息如是行者即是真法出行於世善男子三龍之後代至法王出行治化於是我復為眾生說法如是時者真法行世善男子未來世中一切道俗輕賤法者正由諸惡貪愛道士不行法

故身披法服遂彼俗緣或復市肆販賣自活或復涉路商賈求利或作畫師巧工之業或作相師占視男女或作卜師示人吉凶或作神師令人禮拜種種眩惑飲酒醉亂歌舞作樂或復有人詭曲說法以求人意或誦呪術

以求諸病或復居山不捨俗食以邪定法占視吉凶或行針灸合種種藥以求衣食以是因緣諸惡若滅我法亦滅故名滅法善男子我過去後經八億劫諸惡道士乃當滅盡善男子未來世中道俗之人造立形像或大或小金銀銅木販賣取錢以自給活於是愚人

100114977

造別像又無成就如是人者受罪三塗生為蛇身而元手足善男子若有眾生於食廚處自共唱制防禁四方勿令乞人來我食處如是人者命終當受地獄餓鬼畜生之中常受穢食四足而行善男子若有眾生以三寶物似如已有隨意取用非時而取食噉无足相共出家以為知識如是之人後生遠離人天中生常受遼夷永不聞法死墮三塗无懺悔地善男子若有出家共此人住雖心作福亦不成就被人打破如是人者後死當入大火車獄被人燒爇不可懺悔若有一人唱令救護如是人者亦當得罪若有眾生見諸道士脩行悲心見諸生物他賣買故其人笑言道士貪名此物生命有何福力而汝放之其人爾時即得暴死魂神化生空山餓鷹善男子若有一人於惡世時發生修學大慈大悲忍受他惱勤誦經文應作是念一切眾生无始已來是我父母一切眾生无始已來是我兄弟是我姊妹是我妻子皆是眷屬以是因緣一切眾生皆是我骨肉一切眾生皆是我命

我隨心力斷生熟肉斷生殺念作大慈悲不食雜味日中一食不受別食救濟眾生厄難苦處種種方便不惜身命

爾時天人國主大臣悉皆歡喜我等神通護助此人令不退轉又助勢力勿令惡人為作留難不令惡人侵奪財物如是助者其人功德說不可盡善男子若有一人生慈悲心布施平等一切窮厄悉无偏愛如是功德最勝第一善男子我說布施諸功德門窮劫說之亦不能盡我今當到理運无常誓身滅度為汝等故畧說付囑汝等當應勤心苦行受持思惟得義深味為他講說分別義門令得第一爾時四眾上真童子聞大哀尊說此語已未來世中真法欲木種種災變諸惡道士毀真法門童子等輩肅然毛豎瞻仰尊顏悲號啼泣不能自止苦哉哀尊我等孤露失法宗本夫大依師奈何奈何爾時天尊告大眾等上真童子汝等且止勿令悲泣汝等當知世間无常善者必惡感者必衰有者必无壯者必老復告童子且置是事汝

以何相觀我色身而生啼泣復以何相觀眾生身而失本宗復以何相觀諸法耶而奈何

爾時上真童子拭淚長跪白天尊言我觀天尊不從先際不到彼岸不住世間亦不有无亦非有无亦不有不有亦不无非出非沒非色不色亦非有為亦非无為亦非生死亦非斷常同等虛空无分別相從初成道乃至寂滅我亦不見大哀天尊說一法於諸眾生見大哀尊有出有沒說法度人大哀天尊長樂境界不可思議不可識度識不可知以是因緣而生啼泣唯願天尊為我等輩分別說之我今又觀諸眾生故四大之相何大是我如空中雲如熱時炎如電石光如水中月如幻如化如鏡中像如空中響色相行識悉皆如是眾生心相不可思議非是二乘之所能知大哀天尊眾生之相亦復如是不來不去非有非无非內非外來无所從去无所至而常流轉虛妄受苦皆以眾生无始以來染著我故增長惡根受大煩惱无有窮盡眾生之

相烟燼之源神本澄清湛然元雜一切法本從中而有以是因緣一切眾生善惡諸業唯一心作更無餘法是故眾生不來不去不有不无同等虛空无分別想大眾天尊我觀眾生相法如是爾時

天尊讚童子曰善哉善哉上真童子快說如是法於法中最高第一了眾生相是人尊上善說法相與我无異我所印可說法利益成就天尊曰海空法藏善男子汝了眾生不來去相不有無相汝當應知平等布施若布施時當觀福田及非福田若見貧苦眾生病者悉皆施與平等妙藥行布施時應作是觀不見受者不見施者財物亦爾時三事俱空平等无礙何以故一切諸法清淨无我行布施時不望見報不望未來人天之樂但為眾生求大果報求大安穩行布施時為欲攝取諸惡眾生令住善法而行布施復作是觀三界皆空三世亦空知三世空我身亦空知我身空諸法亦空以法空故故名海空依文字故度諸眾生得住海空真實法地得神通力見

種種色善男子譬如有人於夜中夢見種種事或夢自身被官囚縛受種種苦生大憂惱然後得脫須臾更夢作大國王威勢自在受大快樂即於夢中作是念言我向昨時受苦如是今復自在受大快樂作是念已忽然睡

覺苦樂之事莫知所在如此夢事非有非无一切諸法亦復如是善男子汝得神通了眾生相是名正觀是名正見汝今得進海空法位无量童子得入一乘智藏座所名隨所脩皆得勝進智慧之門无量眾生發出家心无量眾生發布施心若人非人若男若女並得神通爾時

天尊說此語已告童子言善男子未來眾生若有一人得聞此經生歡喜心如是人者所得功德无量无边不可言說若復有人好樂受持封在心中誦憶銘心晝夜思惟讀誦講說利益眾生受記成道當知此經普施孤獨如是人者是我真子所有言說皆是我語以是因緣文字語言與我无量我當返神還寂定位哀諸眾生孤露莫止當付於汝紹統法

王為諸眾生弘宣正道善男子譬如國王欲行諸國巡履萬民是域庫藏當付太子紹統王業善男子我今付汝亦復如是於是大眾聞付囑已各起作禮涕淚哭泣頭面著地聲動一國若人非人彈指歎言善哉善哉奈何

哀尊捨我等輩失法宗本爾時大眾哭泣哀已各各長跪悲哉止慟時大眾中吐相童子即於尊前而偈頌曰

无始天中最上尊 奇特微妙甚真相
種種應現身復身 遍已真法常无量
為我為緣善平等 究竟決了入无常
付囑國王法中尊 言辭善說戒勿忘
我等眾中四輩緣 啼哭流淚絕无想
奈何大慈大哀尊 捨緣捨我寂无像
哀哉我等常孤露 唯願慈悲哀愍我
猶如初生小犢子 法乳飲餒盛壯齒
云何一旦棄本誓 世間孤露莫能擬
仰願海空真法味 遍灑眾生甘露藥
若人非人平等益 四魔三毒滅无餘
利益人天人中人 地獄虛空不永居

罪對分明並了了 俱出生死上仙廬
海空真士大慈故 為我等輩請大師
利益眾生普圓滿 三界魔王滅元期
諸天玉女來讚歎 寶臺山現奇特相
香花遍滿空虛落 時眾人天並恭敬
倏忽身登九重天 頂禮長樂玄都師
俯觀下土眾生城 咸願海空寶藏地
普受若人若非人
爾時上真童子說偈讚已長跪稽首白天尊
言大哀天尊為我等故返神无常說法无我
為无我故而說有我以有故有常无常有樂
无樂有生无生有主无主有空无空以是因
緣付囑法王紹統眾生令不懈怠勸令眾生
求未來惠宣弘一乘海空智藏我等思惟大
哀天尊不生而生无法住不死而死无
法滅為我等故而有生滅為我等故而有返
神入海空藏安住長樂不思議地爾時
天尊聞此說已發微妙音讚童子言善男子
汝等智慧甚勝於我堪任法王紹統眾生令
住安樂海空城中成就眾生智慧之源汝等

且待須臾之頃自當見我說是語已忽然不
見坐空无主四眾咸淚極目四視不能見已
舉首仰天啼哭苦哉我等孤露失法宗本无
依无止猶如初生赤子失大慈母絕於壯齒
大哀天尊我今亦爾失大哀尊絕於法乳亦
復如是爾時四眾聞說是已各共彈指奉辭
而退

太上—乘海空智藏經卷之十

正一天師清微弟子... 製作
道教學術... 網站

高上玉皇本行集經卷上

五二

清微天宮神通品第一

爾時元始天尊在清微天中玉京金闕七寶
玄苑玉皇宮殿昇光明座與無數眾宣說
靈寶清淨真一不二法門是時玉皇尊帝與
諸真聖飛天大聖無極神王靈童玉女九千
萬人清齋建節侍在側焉子時玉帝知時欲
至即於會前舉六通力放大光明徧照諸天
無極梵剎一切境界皆大震動十方無極一
切世界俱同琉璃瓊瑤無有隔礙十方來來
並乘五色瓊輪與碧輦九色玄龍十絕羽
蓋麟舞鳳鳴嘯歌也靈妃散花金童揚煙
讚詠洞章浮空而來是時梵天一切金仙大
乘菩薩四眾八部冰斯光照皆乘金碧九霄
流景飛雲玉輿慶霄四會三辰吐芳飛香八
溱旋繞道前雨眾妙花如雲而下徧覆會前
是時其光徧照諸天下燭下方無極世界同
玄都境凡彼人間上近九天通接交連至親
至邇凡彼下方無極世界山陵坡坂溝澗溪
谷緬平如掌六合至邇三境非遙天寶靈殿